

SECONDA SESSIONE URDINARIA DI U 2022
RIUNIONE DI I 30 E 31 DI MARZU DI
2023

2EME SESSION EXTRAORDINAIRE DE 2022
REUNION DES 30 ET 31 MARS 2023

2023 / 01/021

**REPONSE DE MONSIEUR LE PRESIDENT DU CONSEIL EXECUTIF A LA QUESTION DEPOSEE
PAR MADAME CATHERINE COGNETTI-TURCHINI AU NOM DU GROUPE UN SOFFIU NOVU**

Objet : Confréries

Vi ringraziau pè a vostra quistione, chì ci interrughghja in u prufundu nant'à l'equilibriu da truvà trà u sustegnu à pratiche suciale impurtante, è l'equilibriu di a "laicità benevulente", secondu u dettu di u nostru vescu, a laicità benevulente, postu chì simu in un paese induve u principiu di laicità conta assai, conta a nostra storia, a nostra cultura, a nostra tradizione, postu chì da i tempi landani a Corsica hè stata una terra cristiana, una terra cristiana induve oghje campanu ghjente chì anu altre religione o ch'ùn anu micca religione è chì devenu esse trattati cum'è l'altri citatini. Hè dunque issu cuncettu di laicità benevulente.

Ma prima di risponde nantu à u fondu vi vogliu dì chì a vostra citatione m'hà toccu assai è a vogliu ripete, per ch'è no l'appiimu tutti in capu, ancu per raportu à ciò ch'è no campemu oghje in Corsica.

Avete dettu, di memoria : « u veru esiliu ùn hè micca di lascià u so paese, d'andassine, u veru esiliu hè di campà in un paese induve omu ùn si ricunosce più » .

È mi pare chì ghjè ciò ch'è no campemu l'uni è l'altri, ghjornu dopu à ghjornu è chì l'angoscia tamanta è l'affannu tamantu chì sò causati da 'ssa situazione, pò spiegà dinò certe logiche di rivolta.

Allora, dite "e Cunfraterne", citeraghju trà quelle chì sò rinviute : a Santissima Nunziata di a Vulpaiola, ch'è vo cunniscite bè, quella di San Marcu in Corscia, è po tante altre, l'avete detta.

Hè vera, hè qualcosa d'impurtantissimu è mi pare chì a ghjesgia hà capitu bè ciò ch'ella pudia riprisintà, micca solu per ella, ma pè una sucetà in brama di spiritualità è di lea suciale, a ricchezza ch'ella pò riprisintà a presenza di e Cunfraterne in Corsica.

Avemu scumpartutu pè a Misericordia, a Madunuccia in Aiacciu, è a San Ghjisè in Bastia, emu avutu a furtuna di scumparte pane è tempu cun Munsignore Mamberti chì ghjè unu di i cullaboratori più vicini di u Papa è hà tinutu à sottulinea in ghjesgia quant'elle eranu impurtante e Cunfraterne in Corsica è quant'ellu era impurtante u so rollu, un rollu spirituale, religiosu, ma dinò di sulidarità suciale impurtante è di tramandera à u livellu di a lingua, di i canti, di a cultura, di u mantinimentu di u nostru patrimoniu materiale è immateriale.

Vogliu ramintà dinù u statutu di e Cunfraterne : à u senu di a ghjesgia anu un statutu oghje di cumunità laica, è anu à spessu à u livellu di u dirittu civile, un statutu d'associu, secondu a lege di u 1901.

Dunque nantu à a parte culturale, patrimoniale, suciale, di a so azzione, i pudemu aiutà. Òn pudemu micca, per via di a lege di u 1905, aiutà un fattu religiosu. È quessa ci vole à rispettalla.

Dunque pensu chì ci vole ch'è no riflettimu à u livellu puliticu prufondu, insieme, à a manera di fà è di truvà st'equilibriu ch'o parlava à u principiu di a mo risposta.

Di sicuru e Cunfraterne sò impurtantissime, di sicuru ci vole à aiutalle è cuntinuaremu è rinfurzaremu u nostru aiutu. Ma ci vole dinù à riflette è à ripete chì in Corsica, in tutti i casi ghjè a mo visione di a nostra sucetà, ci hè u principiu di laicità chì cuntinueghja è chì a laicità ùn hè micca di ricasà e religione, ma hè di permette à ognunu di avè una religione o assenza di religione è di campà di modu liberu è sanu.

A ringraziavvi !